

海寧王靜安先生遺書

十二

卷之三

十

觀堂別集

卷三

海甯 王 國維

宋撫州本周易跋

此宋撫州刊本也板心所記刻工姓名如高安國余堅余仁朱涼等均與撫州本禮記刻工同即卷五第十五葉板心所記之巴川鄒郁禮記卷五第八葉及卷十三第十四葉均作崇仁鄒郁蓋蜀人之流寓江右者未可據是定為蜀本也壬戌五月

內府藏宋大字本孟子跋

內府藏宋刊大字本孟子章句十四卷每葉十六行行大十六字小廿一字與日本復宋大字本爾雅注行款正同爾雅後有李鶚書欸一行其源出於五代監本此本避諱至孝宗諱慎字止而字體作瘦金書當亦南渡後所翻北宋末監本也考孟子

刊本始於祥符玉海

三十四

祥符四年十月校孟子七年正月上新

印孟子及音義然音義本每卷首行皆著章數而此本無之又

文字頗與音義互異則此本非出祥符本也而行款乃與五代

北宋監本同頗疑徽宗時監中別有刊本

席益補刻成都石經孟子亦在此時

此本字作

宣和體殆從彼本出也板心有闕西字不知地名抑刊書人名

卷首有蕉林圖書印乃真定梁相國

清標

舊藏乾隆中入內府桂

未谷晚學集與龔禮部麗正書云當四庫館初開真定梁氏獻

孟子趙注章旨及宋槧說文解字官府以孟子說文非遺書不

為上有識者或鈔其章旨流布世閒說文則仍歸梁氏今觀此

帙則當時雖未著錄實已進御矣惜四庫例不錄單注本遂令

此書顯而復晦今上虞羅叔言參事既印行日本仿宋建安音

注本滬上又印行此本以此二本與音義合校殆可復古本之

真書之顯晦抑各有時歟庚申五月

影宋本孟子音義跋

此日照許印林刊本景宋本誤字此本俱已改正惟卷下𧇊夷始犬切當作姑犬切古讀𧇊夷字如卷舒之卷𧇊夷即昆夷之轉猶袞冕字亦為卷也每篇下章數景宋本或闕此本亦俱補足此書除士禮居本僅有此刻可正黃本之誤可謂家塾善本矣庚申八月廿八日

顧刻廣韻跋

此本出於明經廠本經廠本又出於元圓沙書院本余於廣韻有影宋本二影元本一又校得武原張氏所藏南宋刻小字本矣顧復收此本者重其為亭林先生所刊也別本卷首有校勘人姓名一葉有陳上年張昭顧炎武李因篤四人名此本奪此一葉庚申三月九日

此書陳祺公序疑亦亭林先生作亭林後序比文集所載者殊

略蓋彼乃定稿此則初稿也此刻在張曹二刻之先較明內府本及張曹二本頗不易構又為伊墨卿藏書以青蚨二千得之在今日為廉價矣

音學五書跋

音學五書開雕於康熙六年不知何時刊成成後亦時時刊改先生與施愚山書云五書刊改未定作一書與力臣先印詩經并廣韻奉送又與潘次耕書云近日力臣札來五書改正約有一二百處則此書雖刻成而未可印刷前介眉來索此原一亦索此書并欲鈔日知錄我報以詩易二書今夏可印其全書再待一年此二札不知作於何年而先生於康熙十六年與曾庭聞書云音學五書正在刊刻則爾時尚未刊改就緒也其刊改成書當在康熙十九年故於是年作後序

集本序末有上章渚灘病月之望炎武又書十二字

然當時

亦未甚印行陸清獻日記記癸亥

康熙二十二年

十一月三十日淮安閣

百詩來會言顧寧人已不在所著音學五書正在刊刻李文貞

顧寧人小傳云余始官庶吉士曾相遇為半日話

事在康熙九年

復來京師則寧人歿矣

攷文貞入都為康熙十九年距十二年同籍時計七年非距過先生時為七年也時先生在陝亦尚未歿

聞其音學書

已成亟求觀之寧人之學於是始窺其備是先生之書蓋於歿後始大印行其未歿之前意常欲修改至死而後已先生著述之矜慎於此可見此版後歸李文貞蓋至李氏始大印行耳己未季夏大雨時行讀先生文集因攷此書刊定及印刷時代記之如左

此書卷首有曹學佺序署崇禎癸未先生此時實尚未為音韻之學無所謂詩本音并無所謂音學五書也余謂此序出於假託蓋先生前後三序皆不署年號乃假為曹序于前一若此書為明季所刊者蓋以避文字之禍也參閱姓名列徐氏兄弟三人意亦猶是

宋刊後漢書郡國志殘葉跋

宋刻九行本三史余所見有歸安劉氏南海潘氏所藏史記每半葉九行行十九字其列傳二十七後有左迪功郎充無為軍軍學教授潘旦校對右承直郎充淮南轉運司幹辦公事石蒙正監雕二行是南渡初淮南漕司刊本此殘葉半葉九行行十六字與史記行款略同考洪氏容齋續筆云前紹興中分命兩淮江東轉運刻三史板其兩漢書內凡欽宗諱並小書四字曰淵聖御名或徑易為威字而他廟諱皆只闕畫愚而自用為可笑也云云是當時三史由兩淮江東漕司分刊史記既刊於淮南則兩漢書當是江東刊本矣此九行本後漢書藏書家從未著錄與淮南刊史記行款略同殆即兩淮江東轉運司分刊本南林蔣氏藏明裝明鈔本成祖實錄其面葉以此殘葉作襯因乞得之裝成此軸因考其刊刻時地并記其由出如此辛酉冬

水經注箋跋

余於壬戌春見南林蔣氏所藏永樂大典水字韻四冊乃水經注卷一至卷二十卽校於聚珍本上時尚未蓄朱本也後東軒老人復以所藏黃省曾本屬余錄大典本異同因並校之及余至京師始得朱王孫本並見江安傅氏所藏宋刻殘本孫潛夫校本海鹽朱氏所藏明景宋抄本並校於朱本上又錄前所校大典本黃本以資參考惟前校黃本殊草草大典本亦時有一二疑竇思再見之而東軒老人已下世孟蘋亦亡其書殊有張月霄晚年之感欲再借校以畢前業殊非易事門人趙斐雲酷嗜校書於廠肆訪得朱本借余校本臨校一過並屬記其顛末憶余初校此書距今僅六閱寒暑而交游之聚散人事之盛衰書籍之流轉已不勝今昔之感余近年方治他業又未能用力於此書斐雲力學必能補校以成此書之善本然則斐雲以四

閱月之力為余校本留此副墨亦未始非塵劫中一段因緣也
丁卯二月

水經注釋跋

謝山先生於乾隆十四年始校水經注至十七年凡七校其中
十六年秋曾在杭州十七年在廣東十八年七月歸十九年秋
則在揚州以春往十一月始歸然則為東潛作此書時殆在十
六年或十八年秋也至二十年六月而謝山病歿矣

偽齊所刊禹蹟華夷兩圖跋

偽齊阜昌七年岐州學所刊禹蹟華夷二圖石在西安府學原
跋云四方蕃夷之地唐賈魏公圖所載凡數百餘國今取其著
聞者載之是此圖出於唐賈耽華夷圖考舊唐書賈耽傳貞元
十七年耽表言謹令工人畫地內華夷圖廣三丈從三丈三尺
率以一寸折成百里是賈圖所載東西三萬里南北三萬三千

里此圖東抵新羅西盡蔥嶺南距安南真臘北不盡契丹雖比禹蹟圖稍稍增廣而所圖僅方萬餘里尚不及賈圖之半故西域南海諸國僅於圖側附錄其名且加省略非貞元華夷圖之舊矣考賈氏原圖廣袤極大又于貞元中進入至偽齊時殆已亡佚宋史藝文志別載賈氏國要圖一卷蓋賈氏於所進圖外又有略圖其書著於宋志蓋宋時猶有傳本此圖所記西域南海諸國名或卽出於此也魏公地理之學為有唐一代之冠而所著書皆不傳其言入四夷道路者僅存於唐書地理志而華夷圖則於此圖略見梗概皆地理上瓌寶也甲子孟秋

元豐九域志跋

此歸安吳胥石先生所校也嚴九能書五代史記纂誤補後云胥石先生所校元豐九域志最平生用意之作畀人刻之不存己姓名又吳胥石先生墓誌銘云先生之居京師也朝貴歲致

幣物乞代作詩文初不少靳至乞其校定之書刻以行世削先生姓名友朋知其事者為之呼憤先生弗校也是馮氏此書實出胥石先生手微九能記此事則後世其誰知之

隨志跋

隨志二卷四明范氏天一閣舊藏明鈔本無撰人姓名開卷云高之元年鄧武順師至元王右丞以城降既白大夫至而州廢大夫行其後也段令司之及十有三年縣省而州復於是劉大夫莅焉案明史鄧愈傳洪武元年愈為征戍將軍率襄漢兵取南陽以北未附州郡隨葉舞陽魯山諸州縣相繼降又地理志隨州洪武二年以州治隨縣省入九年四月降為縣屬黃州府十年五月省入應山縣十三年五月復升為州皆與此書所紀合則此書實隨州志也四庫全書總目地理類存目有隨志二卷云明顏木撰木字維喬應山人正德丁丑進士官亳州知州

其書乃木罷歸後知隨州蓬溪任德屬木所作上卷始自義皇
訖於明代下卷皆錄詩文雖以隨志為名而木藉應山與隨接
壤志中所載皆合二邑收之其編年之例全仿春秋經文稱隨
為我而以地之沿革官之遷除士之中鄉會試貢大學者案年
紀載皆地志未有之例也云云今此書與顏書名同卷數同惟
所紀事起於洪武十三年訖於嘉靖十一年又隨州事惟載官
吏遷除其餘皆國家大事耆舊佚聞與方志無涉實野史之流
視顏書體例尤為鶻突書中知州事最後者為范大夫欽而此
書出於范氏疑卽范侍郎或其賓客所為昔宋龐元英於元豐
改官制時為尚書主客郎中作文昌雜錄六卷以日錄體記雜
家言而尚書省官上自僕射下至郎員凡有遷除皆記於冊此
書疑亦范侍郎知隨州日手錄明代故事編年為書而卽以隨
之長吏為記事綱領雖仿春秋以十二公為綱之意亦兼用龐

書體例顏木之書亦踵此例惟專記本州事耳全書文字雅馴又多遺聞且為數百年僅存舊帙讀者勿以地志視之可也丙辰九月

唐寫本新鄉衆百姓謝司徒施麥恩牒跋

此牒後署道至元二年蓋至道二年或元年之訛也是時沙州首領為曹延祿則司徒謂延祿也鬱遲仙德鬱遲即尉遲此姓本出于闐故敦煌有此姓也牒中石作碩斗作蚪下翟馬王張曾衆姓共議賑濟凶喪章程內升亦作勝蓋故用繁筆字以杜改竄與一二三作壹貳參同意也

大元馬政記跋

元經世大典政典中馬政一門大興徐星伯先生松從永樂大典卷一萬一千六百七十八鈔出其原本藏江陰繆藝風祕監所此萍鄉文道希閣學從繆氏傳鈔者閣學於光緒丁亥跋此

書云翰林院所藏永樂大典已佚此卷迄今三十年大典散佚殆盡則此卷尤足寶貴矣考元經世大典八百八十卷自明以來久佚乾嘉諸老頗從永樂大典分門鈔撮今惟錢唐胡書農學士所鈔海運一門及星伯先生所鈔驛站一門尚存并此卷而三其全書序錄尚載元文類餘皆不可問矣此門卷首一節卽序錄載於文類者此下尚有小注三百四十七字云太僕寺典御馬左股烙官印號大印子馬其印有兵古貶古閣卜川月思古幹樂等名產駒卽烙太廟祀事及諸寺影堂用乳酪則供牝馬駕仗及宮人出入則供尚乘馬供上及諸王百官捫乳取黑馬乳以供玉食謂之細乳諸王百官者謂之粗乳又自世祖皇帝以下山陵各有醢都取乳以供祀事號金陵擠馬盡三年以與守山陵者抽分羊馬太宗時家有牛羊馬及百者取牝牛羊馬各一頭入官牝馬牝牛牝羊及十頭者亦各取一頭入官

定宗時諸人牛羊馬羣十取其一隱者有罪憲宗時百取其一
成宗時每年七八月閒委人齎聖旨乘驛赴所該州縣與民官
眼同抽分十月分赴都交納宣徽院羣上及百下及三十者抽
分貢不及者免共十五處虎北口駱駝嶺白馬甸遷民鎮紫荆
關丁甯口鐵門關渾源口沙靜州忙安倉庫坊興和等處遼陽
等處察罕腦兒又世祖時不許販馬過南界黃河以南潼關之
東直至蘄縣非官中人不得騎馬皆令賣之於官中仍禁拽車
拽碾及耕地云云今永樂大典本無此注殆蘇氏纂文類時隱
括此門事實為之而注中烙印取乳各事不見此卷中蓋明修
大典已有刪節非全錄原書也然文類所載序錄謠字極多如
所云抽分之地凡千有五此本作凡十有五此十有五處即注
中所載虎北口十五處文類謠十為千大失事實注中謠字尤
不勝舉

上所引者已以元史兵志及
此書各條校正凡十八處

而抽分羊馬十五處乃仁宗延祐元年

事注誤為成宗時事非得此卷曷由正之況其中事實又足補元史及元典章之闕乎今粗為排比刊而行之題曰大元馬政記胡學士所鈔海運一門名大元海運記上虞羅氏已刊入雪堂叢刻中惟驛傳一門卷帙頗大原稿今在俄都聖彼得堡博物館前歲日本京都大學助教授羽田博士亨赴俄攝影以歸二本皆遠在海外傳鈔刊印殊非易事是可憾也丙辰三月此卷乃膠州柯鳳孫京卿勳志藏本次年京卿復以所鈔萍鄉文道希閣學廷式所輯經世大典零種二冊寄羅叔言參事參事復以寄余因編為元高麗紀事大元畫塑記大元氈罽記大元倉庫記大元官制雜記六種為英倫哈同君刊入叢書中尚有謚法一門因謚字太多無從理董然經世大典殘編已刊者并海運馬政二記已得八種因此益思驛站一門關於有元一代政治及地理者尤鉅獨未能寫錄為憾事也丁巳八月又記